

HSET MAHNO

Bàu

achoh

¹ Kan mahno da Chuaq Jesus Christ, Boc Plình ma khoe am deh ka haq òòeq hu paqnoh ka hapõng haq jah loq rìm yiniq ma rênh trùh tangèa kô èh, qmang aih haq khoe thê deh bình plình loh patình ka Jon, aih hapõng da haq,

² aih la mangai anoe hlài bàu Boc Plình xam kan panhìn da Jesus Christ, taboe hlài rìm yiniq òòeq ma khoe hnoq.

³ Xôq ramot am ka mangai òòeq xam mangai tamàng bàu pajàu kô, wèq tiaq rìm nà ma khoe achìh ta kô. Majah qmang aih khoe haqnap trùh òòeq jò.

Bàu achìh am ka tapèh Tagop Hadròeh gùng Asia

⁴ Jon achìh am ka tapèh Tagop Hadròeh oe ta Asia: Waiq kan tabòeh dech xam kan catèm am ka oh daq trùh enh Mangai qnang i, khoe i, i yôt mòeq òòeq, xam enh tapèh yiang oe enh ngèa gèq da haq,

⁵ xam enh nòe Chuaq Jesus Christ aih Mangai panhìn ùh tablòq manoh, aih Kon ramua khoe rìh hlài enh kan cachit òòeq broq cla craq bòe bùa ta cròng taneh.

⁶ Mangai loq waq ka bèn, khoe yòc deh mahim qnheo hreo yiniq lui bèn, broq kabèn wìa òòeq da haq, wìa pajàu Boc Plình aih Baq da

haq, kan ranhòm, kan i cwìang itai oe dìq
ta haq mòeq òòe! Amen.

⁷ “Ngan kô, haq wih hlài tacô xam yùc plình,
rìm mat dìq jah hnoq,
yac ka mangai ma bit haq ji hadai,
dìq dõng ka nang noe ta crõng taneh crò hmoe ka
haq”. Joq qnàng qmang aih! Amen.

⁸ Chuaq aih Boc Plình, Mangai qnang i, khoe i
èh i hloe mòeq òòe aih Mangai i cwìang dìq dõng,
doe: “Au kô Anpha xam Ômega”.

Kan mahno am ka Jon jò oe ta pleo Bat mô

⁹ Au kô Jon, aih oh daq bèn, mangai mòeq bua
ka pì ta kan ranàc, enh dalam ka Chuaq Jesus
Christ hadai chiùq àt chiùq gòm diac plình, au
khoe oe ta pleo Bat mô aih taiq bàu Boc Plình xam
taiq anoe au panhìn ka Chuaq Jesus.

¹⁰ Wop hì da Chuaq, au jah Yiang Hadròeh
qnung, au tàng dèh enh rù i bàu dèh tìah ka bàu
ken,

¹¹ doe rameh: “Achìh qmùt ta hset òòe yiniq ìh
ma hnoq, èh gòe aràng ka tapèh Tagop Hadròeh
oe ta Êphêsô, Simiàcno, Betgam, Thia-tiro, Sađe,
Phila-đenphi xam Laođi-sê.

¹² Jò aih, au hwi enh rù òòeq hu ngan bàu
capoch ka au aih iq bàu cabô,

¹³ bu tawìh, au hnoq tapèh toq jènh ðen broq
xi wang, taqne òòe jènh ðen aih i cabô meh tìah
ka kon ngai, caxùnh eo yòh trùh ta jo, caxi qnam
broq xi wang kàt ajang rada.

¹⁴ Xàc ta gàu haq taboc tìah ka xàc trìu, taboc
qmang ka hiloc, mat haq qmang ka ùnh,

¹⁵ jènh chah qmang ka òùng khoe ram ta tanùh, bàu qmang ka bàu òiac kàn.

¹⁶ Kǒng pah haq qma cadop wê tapèh toq halǒng, enh hacùng loh mòeq pla chang hin baiq mản, hadrò qmang ka mat mahi jò ma qngah òiq jaq.

¹⁷ Bu hnoq, au tabùng cro ajang jènh haq tiah ka mangai cachit; mahaq haq yǒc tì pah qma bèq chac au, rai doe: “Apaq yùq cleq! Au kô Mangai ma adroe xam Mangai ma atiq òong,

¹⁸ Au Mangai rih, au khoe achit mahaq manòeq kô ngan beq au rih mòeq òòe, wèq gahlòng da kan cachit xam nòe mangai cachit oe.

¹⁹ Qmang aih, drah achih rìm yiniq ìh ma khoe hnoq, bòe yiniq ma qnang i manòeq xam bòe yiniq padon trùh ta atiq kô òh,

²⁰ aih la bòe kan bahlèp da tapèh toq halǒng ìh khoe hnoq enh kǒng pah qma au, xam da tapèh toq jènh òen wang. Tapèh toq halǒng aih bình plình da tapèh Tagop Hadròeh, tapèh toq jènh òen aih tapèh Tagop Hadròeh”.

2

Achih ka Tagop Hadròeh Êphêsô

¹ Achih ka bình plình da Tagop Hadròeh Êphêsô rameh:

Kô bàu da Mangai kǒng pah qma haq ma wê tapèh toq halǒng rai cadiang lam taqne tapèh toq jènh òen wang:

² Au loq yiniq broq da ìh, au jì loq kan xalep, kan loq kềm da ìh; au loq ìh ùh jùh jùn ka mangai dù, au jì loq ìh khoe qnhro bòe mangai ma doe

đeh kô broq mangai tiaq cla, ìh khoe jah hnoq joq qnàng aih òòe mangai ti patiah.

³ Ìh loq kềm rai chiùq xalep ka yiniq au, ùh hiaq tagah lep.

⁴ Mahaq i yiniq kô au cwò ka ìh, aih ìh khoe cađac kan loq waq jò baxèm.

⁵ Qmang aih, hmàng hlài beq đeh khoe cro ajang leq, drah raxach rai boq hlài dèh yiniq ìh ma khoe broq enh jò baxèm; ùh meh au trùh ta ìh, tàng ìh ùh raxach aih èh au dèch đac da ìh đên khoe ka nòe da haq.

⁶ Mahaq ìh i mòeq yiniq kô ma yi wìa, aih ìq ìh git ka yiniq broq da bua Nicôla, yac ka au hadai git.

⁷ Cabô i don, drah tamàng bàu Yiang Hadròeh anoe ka òòe Tagop Hadròeh: Mangai leq blêq, au jah am wì haq acaq plì long kan rih oe ta Parađi da Boc Plinh.

Achìh am ka Tagop Hadròeh Simiàc-no

⁸ “Achìh ka bình plinh da Tagop Hadròeh Simiàc-no rameh:

Kô bàu da Mangai ma adroe xam Mangai ma pulùch dǒng, Mangai khoe cachit yàng mahaq khoe rih hlài:

⁹ Au loq kan xalep, kan pa hamoq da ìh, (yac ka ìh padrǒng kan), xam òòe bàu capoch patah, capoch qmèq enh òòe wì ma doe đeh kô mangai Juda, ma joq qnàng aih ùh xài, wì haq aih mòeq bua ka tagop da Satan.

¹⁰ Ìh apaq yùq ka rađeh ep glàm kan nanxa. Au doe ka ìh loq, kô èh taqne pì qmat Satan padon rùp clêh bàc ngai ta hnim cadrong, òòeq hu qnhro

ngan pì, pì glàm kan nanxa ta mòeq jàt hì. Ep wèq manoh ùh tablòq trùh cachit, aih èh au hì am ka pì cadoh kan rih da diac plình.

¹¹ Cabô i don, drah tamàng bàu da Yiang Hadròeh anoe ka bôe Tagop Hadròeh: Cabô blêq, kan cachit yàng atiq kô èh pì broq cleq ka haq aih jah.

Achìh ka tagop Hadròeh Becgam

¹² Hadai achìh am ka bình plình da Tagop Hadròeh Becgam rameh: Kô bàu da Mangai i pla chang hin baiq mản:

¹³ Au loq nòe ìh qnang oe qmat gèq da satan; ìh khoe wèq cajap manoh ta yiniq au, ùh cađac manoh lùì ajang au; yac ka jò Antiba, aih mangai đìq ka manoh anoe panhìn ka au khoe cachit đeh ka wì jêh đac tanòe pì, aih nòe Satan oe.

¹⁴ Mahaq i nòe au cwò ka ìh: Majah qmang aih, ta qmat pì i mangai tiaq trong da Bala-am, aih mangai ma hnài Balac roh hmo catoeh enh qngèa mangai Isorali, òeq padô wì haq acaq jam tadreo kiac chốc rai ti adràc wì haq ti tango taqnung.

¹⁵ Ta ìh qmat hadai i mangai cadiang tiaq bàu trong da Nicôla.

¹⁶ Qmang aih, drah loq raxach beq, tàng ùh meh, au rênh trùh ta ìh, yốc deh chang enh hacùng òeq hu tajêh ka wì haq.

¹⁷ Cabô i don, drah tamàng bàu Yiang Hadròeh doe ka rìm Tagop Hadròeh: Mangai leq blêq, au am ka haq mana ma qnang cadoc hlêp, au hadai am ka haq pliang raga taboc, ta ai i achìh mòeq toq yiniq neo, enh gùng ka cla mangai jah ùh i cabô loq.

Achìh ka Tagop Hadròeh Thia-tiro

¹⁸ Ìh hadai achìh ka bình plình da Tagop Thia-tiro rameh:

Kô bàu capoch da Kon Boc Plình, aih Mangai mat tìah ka ùnh, jènh tìah ka òùng ma चाह दिग् cajaq:

¹⁹ Au loq yiniq broq da ìh, kan loq waq da ìh, manoh lùì ìh, trong patìh dìq ka manoh da ìh, manoh loq kềm da ìh, bòe yiniq ìh broq ta atìq kô kiang èh kiang bàc yeo loe ka angoe.

²⁰ Mahaq yiniq au ma cwò ka ìh, aih ì oe jùh jùn ka Jêsaben, mangai cadri aih cla haq doe ðeh kô pajàu, toq ti hnài rai padô hapõng au, òòeq hu aluàn wì ta kan tango anang, acaq jam tadreo.

²¹ Au khoe am ka haq i jò òòeq hu loq raxach, mahaq haq ùh raxach ðeh kan tango aih.

²² Kô èh au khwênh haq ta juàng jìq hiang hloe xam bòe mangai wiang tango ka haq, tàng wì haq ùh raxach trong yiniq lui aih, au hadai khwênh caqnìh wì haq ta kan ranàc kàn.

²³ Au jêh ka cachìt bòe kon da haq; aih èh rìm Tagop jah loq au kô Mangai loq ta manoh cliac kon mangai, èh au hi tiaq qmòe tang yiniq rìm ngai khoe broq òòeq hu patem chau ka wì haq.

²⁴ Mahaq pì xam wì qnoeq ma hahdai oe ta Thia-tiro, ùh tiaq trong aih, qnhòq qnì ðeh kan tai cliac Satan, qmang ka wì haq ma anoe ðeh yôt, aih au tanap ka pì au ùh taqmòq tam ka pì kan trap qnoeq.

²⁵ Toq pì ep wèq ka cajap bòe yiniq ðeh ma khoe i, trùh jò au trùh.

²⁶ Mangai leq blêq, broq tiaq manoh au trùh lùch trùh gêh, aih èh au am ka haq cwìang òdeq broq gàu bàc diac:

²⁷ haq wèq cwìang xi long dùì mem, tùq bahech bòe diac aih budàng abôq taneh, qmang ka au khoe jah cwìang aih enh nòe Baq au.

²⁸ Au am ka haq aih halông sroq.

²⁹ Cabô i don, drah tamàng bàu Yiang Hadròeh anoe ka bòe Tagop Hadròeh!

3

Achìh ka Tagop Hadròeh Sacđe

¹ Ìh achìh ka bình plình da Tagop Hadròeh Sacđe rameh:

Kô bàu da Mangai carùp wê tapèh yiang da Boc Plình xam tapèh toq halông: Au loq yiniq broq da ìh, ìh i qmòe tiàng òe rìh mahaq cachìt.

² Drah rìu beq! drah broq ka cajap hlài bòe yiniq ma oe i, aih bòe yiniq ma oe toq hu cachìt, majah qmang aih, enh ngèa Boc Plình au ùh i hnoq ìh broq yiniq cleq ma gêh geo.

³ Qmang aih hmàng hlài beq! Ìh khoe jah yóc khoe jah tàng qmang leq, thê cajap tiaq qmang aih rai loq raxach beq. Tàng ìh ùh drah rìu, au trùh tiàh taiq ka mangai lam atùng, ìh ma qnì jò leq au trùh rùp ìh.

⁴ Mahaq ta Sacđe oe i biaq ngai qnhòq hìaq broq amùa deh ka eo yôh: Wì aih èh jah caxùnh eo taboc hu lam ti au, majah qmang aih wì haq tajì ka jah qmang aih.

⁵ Mangai leq blêq, jah caxùnh eo taboc qmang ka wì aih. Au ùh xùt đac yiniq mangai aih loh

khoe ka hset kan rih, mahaq au creo ràu yiniq haq aih enh ngèa Baq xam enh ngèa bòe bình plình da Haq.

⁶ Cabô i don, drah tamàng bàu Yiang Hadròeh anoe ka bòe Tagop Hadròeh.

Achìh ka Tagop Hadròeh Phila-đenphi

⁷ Ìh hadai achìh ka bình plình da Tagop Hadròeh Phila-đenphi rameh:

Kô bàu da Mangai hadròeh, Mangai hnhuh jang, Mangai i khoaq da Đawit, Haq hi pèch pì i cabô oe jah clênh, Haq hi clênh pì i cabô oe jah pèch:

⁸ Au loq yiniq broq da ìh, au khoe pèch mòeq toq qmang enh ngèa ìh, ùh i cabô jah clênh; majah qmang aih au loq ìh biaoq ðeh padren, mahaq khoe wèq bàu au, ùh hangah ðac ka yiniq au.

⁹ Au am ka ìh biaoq ngai oe tagop Satan, wì haq doe radeh kô mangai Judà, yàng ma joq qnàng aih ùh xài, wì haq capoch qnùt, kô èh au broq ka wì haq thia bla op ðeh ta jènh pì, aih èh dôtq wì haq loq au khoe loq waq dèh ka ìh.

¹⁰ Pàng ìh khoe dràng cajap wèq tiaq bàu thê da au, kèmm manoh jò glàm nanxa, au hadai wèq ìh claih kan qnhro kàn padon trùh jàp ta crông taneh aih la jò ðòeq qnhro ðiq dõng ka mangai.

¹¹ Au rênh trùh, drah wèq bòe yiniq ìh khoe i, ðòeq ùh hiaq i cabô jah yõc da ìh cadoh lem diac plình.

¹² Cabô blêq, au jah am haq broq jrang ta hnim kùh waiq Boc Plình au, aih èh wì haq pì talah enh aih hòmm; au jah yõc yiniq Boc Plình au, xam yiniq plài Boc Plình, aih Jerusalem maneo, (Jerusalem

ma loh enh plình, loh enh Boc Plình au) xam yiniq neo da au ðòeq hu achìh ka wì haq.

¹³ Cabô i don, drah tamàng bàu Yiang Hadròeh anoe ka òòe Tagop Hadròeh.

Achìh ka Tagop Laođixê

¹⁴ Ìh hadai achìh ka òhnh plình da Tagop Hadròeh Laođixê rameh:

Kô bàu da Mangai Amen, aih Mangai panhìn ùh tablòq manoh joq qnàng, haq aih broq cla craq rìm yiniq Boc Plình ma broq loh enh jò baxèm:

¹⁵ Au loq yiniq broq da ìh, ìh ùh hangeo hadai ùh tôq, Au ngèh ka ìh hangeo tàng ùh meh tôq ðồng aih yeo hnau hòml

¹⁶ Mahaq ìh toq ha-onh, ùh tôq ùh hangeo, dài au majah laq qnoh ðac ìh.

¹⁷ Cla ìh doe: Au padrǒng, au khoe kan, pi oe nhet cleq hòml; yàng ìh ùh canau ka ðeh kô hrah hrôm, nanxa, pa hamoq, lua mat rai ta talùch chac dech.

¹⁸ Au pariaq ìh drah rot enh au wang ma khoe bùh ta ùnh, ðòeq ìh jah padrǒng kan, rot òòe blah eo taboc ðòeq hu caxùnh, qmang aih èh kan camaih kan rahòng ìh jah taqmàn cadoc, rot jreo ðòeq xùt mat ðòq ìh hujah xau hnoq.

¹⁹ Mangai leq au ma loq waq ðèh aih au cwò au hnài; qmang aih drah i manoh loq nhet, loq raxach.

²⁰ Hacô, au yòng enh gùng rai clòq qmang; tàng i cabô tàng au bàu rai loh pèh qmang ka au, aih èh au mùt pajùm ti haq, acaq ti haq, haq acaq ti au.

²¹ Mangai leq blêq, au am haq haqngui ti au ajang nòe gèq da au, tiah qmang ka au khoe blêq jah haqngui ti Baq au ta gèq haq.

²² Cabô i don, drah tamàng bàu da Yiang Hadròeh anoe ka bòe Tagop Hadròeh!

Bòe yiniq Boc Plình mahnu am ka Jon jah hnoq

4

¹ Khoe aih, au ngan hnoq, i mòeq toq qmang tapèch ta plình, bàu au tàng yàng ma baxèm haq ranòq tiah ka bàu ken doe ka au: Drah tǒc tacô, au hu am ìh hnoq rìm yiniq ma ep trùh atìq kô èh.

² Tajòe qmòe jò aih Yiang Hadròeh mùt ta au, au hnoq i mòeq toq gèq ta plình, ta gèq aih i mòeq Ngai qnang haqngui ta aih.

³ Haq ma haqngui ta aih qngah qmang ka ngǒc hmu lang xam ngǒc mainau, i rawiang hadong qngah qmang ka ngǒc nget gwian dudan ka gèq.

⁴ Dudan ka gèq i tam baiq jàt pôn toq gèq hòh, ta gèq aih au hnoq baiq jàt pôn ngai gucraq haqngui, caxùnh eo taboc gàu wì haq kui cadoh broq xi wang.

⁵ Enh gèq aih i bòe kan camlet xam bòe bàu cađah; xam tapèh toq đen bùh qngah qngai enh ngèa ka gèq: Aih raq tapèh yiang da Boc Plình.

⁶ Enh ngèa ka gèq i diac raxìq hliang qmang ka guàng, taqne xam dudan ka aih i pôn toq ngè rìh, enh ngèa, enh rù, ajang leq xôq i mat.

⁷ Ngè rìh ma baxèm tiah ka sutùh, ngè rìh ma hatia tiah qmang ka òo calô, ngè rìh ma atìq hòh tiah ka hadrò mangai, ngè rìh ma pulùch tiah qmang ka cliang kèn qnang pan.

⁸ Pôn toq ngè rìh aih, rìm toq dìq i tadràu toq panan, dudan enh gùng xam enh dalam ka chac haq dìq i mat; dahì damang ùh jò leq hêq ka doe: “Hadròeh, Hadròeh, Hadròeh aih la Boc Plình i cwàng itai rìm trong.

Adroe khoe i, manòeq qnang i, atìq èh dua i!

⁹ Jò pôn toq ngè rìh aih yóc bàu manè hu dèch kan ranhòm ka haq ma qnang haqngui ta gèq, aih Mangai ma rìh halình mòeq òe.

¹⁰ jò aih baiq jàt pôn ngai gucraq bla op enh ngèa ka Mangai ma qnang haqngui tagèq bùa, rai kùh waiq haq ma rìh halình mòeq òe; khoe aih doeh deh cadoh enh gàu òe q ta haqneq enh ngèa ka gèq bùa rai doe:

¹¹ “Waiq Boc Plình aih Chuaq da nhèn,

ìh taji òe q jah kan ranhòm, kan rahù xam cwàng itai,

majah qmang aih ìh khoe broq loh rìm yiniq;

tiaq deh manoh ìh enh, rìm yiniq men khoe i, men khoe jah broq loh”.

5

Hlìa hset canua

¹ Khoe aih au hnoq, ta kǝng pah qma Mangai ma haqngui tagèq bùa i mòeq toq hset achìh enh dalam xam enh gùng, hset kô khoe i tapèh toq teo nìm padràng.

² Au hadai hnoq mòeq bình plình ma dèh padren crêu cadêh: Cabô ma taji òe q pèh hset kô èh rai doeh bòe nìm pateo kô?

³ Yac ka ta tróc ta taneh, hloe enh caqnàm taneh dua pi oe i bô jah pèh ngan, loq oe jah chri ngan enh dalam hset canua kô hòm.

⁴ Pàng ùh i qmòe ka cabô ma tajì ka jah pèch jah chri ngan enh dalam ka hset canua aih hòm, dài au majah toq hmoe diac mat loh da dahràc.

⁵ Jò aih i mòeq ngai taqne wì gucraq doe ka au: Pi dùh hmoe, hatau, sutùh da xinoe Juda, aih hamông da bùa Đawit, khoe blêq, Haq aih jah pèch hset qmat rai toeh tapèh toq nìm padràng qmat.

⁶ Khoe aih au hnoq, Kon Trìu yòng qne Gèq bùa, èh pôn toq ngè rìh xam òe wì gucraq oe dudan haq; Kon Trìu qmang ka khoe cachit ka wì jêh đac, Kon Trìu i tapèh toq haki xam tapèh toq mat, aih raq tapèh yiang da Boc Plình ma thê loh lam jàp crống taneh.

⁷ Kon Trìu cadiang trùh, yỗc hset ma oe ta tì pah qma da Mangai ma haqngui tagèq bùa.

⁸ Jò Haq yỗc hset, pôn toq ngè rìh xam baiq jàt pôn ngai gucraq diq bla op enh ngèa Kon Trìu, mòeq ngai wê mòeq toq broc xam òe cabi wang ta aih tah bình gahnàu xua thùm; aih la bầu waiq khàn da òe mangai da Boc Plình.

⁹ Wì haq calêu òe maneo rameh:

“Ìh tajì ka yỗc hset, rai doeh òe teo nìm;
majah qmang aih ìh khoe chiuq cachit,
yỗc deh mahim cla òeq hu baxon ka Boc Plình,
òe mangai ta rìm xinoe, rìm bầu capoch, rìm adrech, rìm diac,

¹⁰ Haq broq wì aih wìa diac da bùa, wìa pajàu patìh ka Boc Plình bèn;

wì aih jah broq mangai pagàu ta crống taneh.”

¹¹ Khoe aih, au ti ngan, au tàng haraya bàu da ònh plình bình ka muàn ka jàt muàn. Wì dudan ka Gèq xam bòe ngè rìh xam bòe gu craq.

¹² Pajùm ti dabau wì haq capoch cadêh:
 “Kon Triu ma khoe chiùq cachit,
 tajì òòeq jah kan itai, padròng, rabiaq loq, jah
 padren dêh,
 jah padêch haqnêq, jah ranhòm xam bàu manè!”

¹³ Atìq ka aih au tàng rìm yiniq ma khoe jah broq loh oe ta plình, ta cròng taneh, ta caqnàm taneh, ta diac raxiq, xam rìm yiniq ma oe ta aih òìq anoe rameh: “Waiq ka Mangai ma haqngui tagèq bùa xam Kon Triu jah bàu manè enh, jah kan padêch haqnêq, ranhòm xam kan i cwìang itai mòeq òòeq!”

¹⁴ Pôn toq ngè rìh òìq doe: “Amen”. Èh bòe gucarq hi bla op ta haqneq òòeq kùh waiq.

6

Doeh teo nìm ma baxèm

¹ Au ngan hnoq, jò Kon Triu pèh nìm ma adroe ta tapèh toq nìm, au hnoq i mòeq ta pôn toq ngè rìh capoch bàu qmang ka atêh hilùng: “Trùh beq”!

² Au ngan hnoq, i mòeq toq axêh mống. Mangai haqngui enh cròng axêh i mòeq toq panenh; i mangai am ka haq mòeq toq cadoh bùa, èh haq lam tìah taiq ka mangai ma khoe blêq, lam pang leq blêq pang meh.

³ Jò Kon Triu pèh nìm ma baiq, au tàng bàu ngè rìh ma baiq doe: “Trùh beq”.

⁴ Tajòe qmòè jò aih loh mòeq toq axêh gòh. Mangai haqngui ta cròng axêh i cwìang dèch đac

kan catèm loh khoe ka crông taneh, ðòeq kon mangai wì tajêh ðac dabau, èh i mangai am ka haq mòeq pla chang kàn.

⁵ Jò Kon Trìu pèh nìm ma piq, au tàng nè rìh ma piq doe: “Trùh beq”. Au ngan hnoq i mòeq toq axêh gam. Mangai haqngui crông axêh tì haq wê mòeq toq kìq.

⁶ Au tàng taqne pôn toq nè rìh loq tadroq i bàu doe: “Mòeq kìq qmau mì tech mòeq ðoniê, piq kìq qmau mat nha tech mòeq ðoniê, khoe ka aih dầu xam alac ðôq haq apaq troq.”

⁷ Jò Kon Trìu pèh nìm ma pôn, au tàng nè rìh ma pôn doe: “Trùh beq”.

⁸ Au hnoq loh mòeq toq axêh nget bah bah. Mangai haqngui ta crông axêh, yiniq haq aih Kan cachìt, i hwình clam tiaq gít enh rù haq. Wì haq i cwìang mòeq phàn pôn ta crông taneh, ðòeq jêh ðac kon mangai xi chang, xam kan pangot hrah, xam kan jìq dài, xam bòe nè dù ta crông taneh.

⁹ Jò Kon Trìu pèh nìm padam, au hnoq ta caqnàm prang tadreo i bòe mahua da bòe mangai ma khoe cachìt taiq wì haq tiaq trong Boc Plình xam bàu wì haq ma lam anoe.

¹⁰ Dìq ka wì haq crêu qmòe cadêh: “Waiq Chuaq nhèn, aih Mangai Hadròeh, Joq qnàng, ìh oe taqnùhà gòm trùh jò leq hòmen men hadrah rai patem chau bòe mangai ta crông taneh ma khoe broq ta-ùc mahim nhèn?”

¹¹ I mangai am ka wì haq mòeq ngai mòeq blah eo yôh taboc; èh i bàu doe ka wì haq ep gòm tam toq bìaq hòmen, trùh jò leq hì jah tòm ðài mangai ma

hadai wiang abroq, ma hadai ep cachit qmang ka wì haq diq.

¹² Au ngan hnoq, jò Kon Triu pèh nìm tadrâu, aih taneh loh kan ralàng kàn, mat mahì loh ka clam cluiq qmang ka caxop bai xàc gam, mat khê tìah ka mahim.

¹³ Bài halǒng ta trǒc cìh taqneq, tìah ka plì hra tagoe long hadrùih jò cayêu hlui dèh.

¹⁴ Trǒc ka canua hlài qmang ka wì canua hset broq xam akia, bài bui wang xam bài pleo diac hadai haprah hangai deh ka nòe oe;

¹⁵ Bài bùa ta crǒng taneh, bài cwan kàn, bài cla craq lình, bài mangai padrǒng, mangai i cwiang, mangai hapǒng díc, mangai broq cla dīq cadàu lam amot roc ralùng, roc kòp hmo kàn ta wang,

¹⁶ wì doe ka bui wang doe ka hmo kàn: Thê cìh enh qnhèq ka nhèn kô beq, dōq nhèn jah hlèp khoe ka hadrò Mangai ma haqngui tagèq bùa rai jah claih ka kan nòeh da Kon Triu!

¹⁷ Majah qmang aih hì panuq kàn da haq khoe trùh, cabô ma oe dràng yòng?

7

Boc Pình hadro òeog deh bòe hapǒng

¹ Khoe ka aih, au hnoq i pôn bình pình yòng ajang pôn toq mùm taneh, tì wì haq rúp padràng pôn qngèa cayeo, dōq ùh hìaq i cayeo hlui ta taneh, ta diac raxiq, tagoe long.

² Au hnoq hòm i mòeq bình pình qnoeq, tǒc enh apah mat mahì loh, tì haq wê ngè pateo da Boc Pình ma rìh halình. Haq dèh bàu crêu rai doe ka

pôn bình plình ma khoe jah cwàng òeq broq kan
hàbo ka taneh xam diac raxiq.

³ “Apaq broq kan hàbo ka taneh, ka diac raxiq
xam bài long trùh jò leq bèn khoe pateo hadro ta
ngòng bài hapông da Boc Plình bèn.

⁴ Au tàng, bài mangai majah pateo hadro aih
jah: 144.000 ngai loh enh bài xinoe Isorali;

⁵ Enh xinoe Juda jah: 12.000 ngai;

Enh xinoe Rubên jah: 12.000 ngai;

Enh xinoe Gat jah 12.000 ngai;

⁶ Enh xinoe Ase jah 12.000 ngai;

Enh xinoe Neptali jah 12.000 ngai;

Enh xinoe Manase jah 12.000 ngai;

⁷ Enh xinoe Sime-ôn jah 12.000 ngai;

Enh xinoe Lêwi jah 12.000 ngai;

Enh xinoe Ysaca jah 12.000 ngai.

⁸ Enh xnoe Sabulôn jah 12.000 ngai;

Enh xinoe Jôsep jah 12.000 ngai;

Enh xinoe Bênjamin jah 12.000 ngai jah pateo
hadro.

⁹ Hi khoe ka aih, au hnoq bài mangai haraya
rayúc, pi bô oe òeq rên, loh enh rìm diac, rìm
xinoe, rìm gùng, rìm bàu capoch; wì haq yòng enh
ngèa ka gèq bùa xam enh ngèa Kon Trùu, caxùnh
eo yôh taboc, tì wì haq wê hamenh hla hanoc,

¹⁰ wì haq creo cadêh:

“Kan dèch claih loh enh Boc Plình bèn,

aih Mangai ma haqngui tagèq bùa,

Xam enh Kon trùu”.

¹¹ Òiq òng bình plình yòng dudan ka gèq bùa,
dudan ka bài gucraq hloe xam pôn toq ngè rìh,
kùp deh hadrò enh ngèa ka gèq bùa rai kùh waiq
Boc Plình,

¹² wì doe:

“Amen! Bàu manè enh, kan ranhòm, kan rabiaq,
kan manè apôi, kan tajì, kan itai xam
padren dèh, hlài dìq ta Boc Plình bèn mòeq
đòeq ùh lùch! Amen”.

¹³ Jò aih i mòeq ngai gucraq bòch au: “Dìq ka
mangai ma caxùnh eo yôh taboc qmat iq cabô, wì
haq trùh enh leq?

¹⁴ Au padreo bàu: “Wì craq! Ìh loq trong aih”.
Haq doe ka au: “Wì haq qmat aih la bài mangai
ma khoe loh enh kan nanxa kàn, khoe rùh, khoe
broq dèh eo jah taboc ta mahim Kon Triu.

¹⁵ Qmang aih, dài wì haq majah haqngui enh
ngèa ka gèq bùa Boc Plình, dahì damang jah patih
ta hnim kùh waiq da haq; Mangai ma haqngui
tagèq bùa jah wèq ban wì haq.

¹⁶ Wì haq pì pangot, pì croh ranõng hòmh; pì i ka
mat mahì, pì i kan tôq enh leq oe jraq wì haq.

¹⁷ Majah qmang aih Kon Triu oe taqne gèq bùa
jah rai ban rai ajèn qnùng wì haq trùh ta bài cròng
diac rìh; Boc Plình jah xùt dìq đổng diac mat wì
haq.

8

Nìm ma tapèh, Pôn bình plình hlui ken

¹ Jò Kon Triu pèh nìm ma tapèh, ta tróc hatinh
jah qnah qne jò.

² Au hnoq tapèh ngai bình plình yòng enh ngèa
Boc Plình, i mangai am ka wì haq tapèh toq ken.

³ Khoe aih i mòeq bình plình qnoeq trùh yòng
ajang prang kùh waiq oe enh ngèa ka gèq bùa,
haq wê abôq broq xi wang, haq jah bàc gahnàu,

đòeq dèch atốc gahnàu aih taprang kùh waiq broq xi wang enh ngèa ka gèq bùa pajùm ti bàu waiq khàn da bòe mangai Boc Plình.

⁴ Nhòe linh gahnàu enh tì bình plình aih, pajùm ti bàu waiq khàn da bòe mangai da Boc Plình pan tồc trùh enh ngèa Boc Plình.

⁵ Khoe aih bình plình wê abôq wang yốc ùnh enh prang kùh waiq tah bình ta aih, khoe aih hwênh qnìh ta crống taneh: Tajòe qmòe jò aih i bòe atêh hilùng dèh, cađah, camlet xam kan taneh ralàng.

⁶ Tapèh bình plình wê tapèh toq ken hi padon hlui.

⁷ Bình plình ma adroe hlui ken, trồc loh ka cìh preo i xam ùnh clai pajùm ti mahim dahrôq loh ta crống taneh. Mòeq ta piq phàn taneh loh ka ùnh cheo, mòeq ta piq phàn bài long, ùnh cheo dồng, rìm adrech nhat cheo dìq.

⁸ Bình plình ma baiq hlui ken: i kan cato kàn tìah taiq ka bui wang kàn xi ùnh hwênh qnìh ta diac raxìq. Mòeq ta piq phàn diac wìa mahim,

⁹ mòeq ta piq phàn ngè rìh ta diac raxìq cachìt dồng, mòeq phàn piq bài boang loh ka raliang.

¹⁰ Bình plình ma piq hlui ken, aih i mòeq toq halống kàn cìh enh plình, cheo loh qmòe pla ùnh qmang ka hiloeh hadreo; halống aih cìh ta mòeq phàn piq cròng diac xam goe diac.

¹¹ Yiniq halống aih: Cachiq xang, mòeq phàn piq cròng diac loh dồng ka xua qmang ka cachiq xang, broq ka bàc ngai cachìt, majah qmang aih diac khoe loh ka xang.

¹² Bình plình ma pôn hlui ken, mòeq phàn piq mat mahì pi qngah, mòeq pàn piq mat khê xam mòeq phàn piq bài halống hadai, dồq mòeq phàn

piq bàikan qngah aih loh dǒng ka clam, ðòeq jò dahì hnhung mòeq phàn piq kan qngah, damang hanoh.

¹³ Jò aih au ti ngan, au tàng bàu cliang kèn pan taqne trǒc rai crêu cadêh: Hăbo qnàng! Hăbo qnàng! Hăbo qnàng! Ka bài mangaima rih ta crǒng taneh, majah qmang aih oe i bàu ken da piq bình plình qnoeq ma padon hlui hòm.

9

¹ Bình plình ma padam hlui ken, aih au hnoq mòeq toq halǒng enh plình clìh ta crǒng taneh, khoe jah am ka halǒng aih khwaq da hwình jrùq ùh lùch,

² Halǒng aih pèch hwìn jrùq ùh lùch aih, i nhòe enh qneq pan ta atǒc, tiàh ka nhòe da tanùh kàn; mat mahì xam hòe cayêu loh dǒng ka clam ka nhòe enh hwìn jrùq.

³ Enh nhòe aih prai loh bài lip pan jàp ta crǒng taneh; i mangai am ka wì haq cwìang tiàh qmang ka agôt ta taneh.

⁴ I bàu ùh lòh wì haq apaq troq đăc bài nhat oe ta crǒng taneh, enh long qyoh trùh long kàn, mahaq jah troq đăc toq bài mangai ta ngòng wì haq ma ùh i ka teo da Boc Plình.

⁵ Êh am ka wì haq cwìang ùh xài ðòeq hujêh đăc, mahaq ðòeq toq pani bài mangai aih ta padam khê, kan baxa aih tiàh ka jò agôt kap.

⁶ Ta bài hì aih, kon mangai chaq kan cachìt mahaq chaq ùh jah; wì tangêh ka jah cachìt yàng kan cachìt wia đăc ka hangai.

⁷ Bài lip aih tiàh ka axêh khoe padon ðòeq hu lam tajêh tablah: Tagàu wì haq i cadoh bùa tiàh

taiq ka wang, mùh mat haq qmang ka hadrò mangai;

⁸ haq i xàc qmang ka xàc gàu gucadri, hanenh haq qmang ka hapoh sutùh.

⁹ Haq i caqmoc qmang ka caqmoc mem, atêh panan da haq tiah ka atêh bàc toq xê ma i bàc toq axêh dùì tùh loh tanòe tajêh.

¹⁰ Tênh haq i nóc qmang ka agôt, haq yóc tênh aih ma baxa pani kon mangai ta padam khê.

¹¹ Haq i bùa pagàu, aih mangai da hwin jrùq, bàu Hêbru doe: Abadôn, bàu Grec doe Abôliôn.

¹² Kan ranàc ma adroe bu khoe; manòeq kô oe i tam baiq kan ranàc trùh atiq ka aih hòh.

Bình plình ma tadràu hlui ken

¹³ Bình plình ma tadràu hlui ken, aih au tàng i bàu loh enh pôn toq haki da prang kùh waiq broq xi wang ma òòeq enh ngèa ka Boc Plình.

¹⁴ Bàu aih doe ka bình plình ma tadràu qnang wê ken: “Drah caqnaih pôn bình plình ma qnang bìq kàt òòeq ta crông diac kàn Ophorat beq”.

¹⁵ Pôn bình plình aih khoe rap gòm òòeq waq toq hi troq deh jò, hì, khê, hanam, jah caqnaih hu lam jêh cađac mòeq ta piq phàn kon mangai.

¹⁶ Lình kòe axêh da bài lình aih rên jah baiq hrinh trùuq; aih sôq au ma khoe tàng.

¹⁷ Axêh xam mangai kòe axêh au ma hnoq takan mahnò aih qmang kô: Bài wì aih òiq caxùnh eo jop gòh qmang ka ùnh, mau nget gam, mau drinh da liu hwình; gàu axêh tiah ka gàu sutùh, hacùng haq caprôh loh ùnh, loh nhòe xam liu hwình.

¹⁸ Mòeq phàn piq kon mangai cachit ka piq kan ranac kô aih: ùnh, nhòe, xam liu hwình loh enh hacùng axêh.

¹⁹ Majah qmang aih cwìang itai da axêh aih oe jang hacùng xam ajang tênh haq, bài tênh aih tìah qmang ka bìh, i gàu, wì haq yỏc deh gàu aih hu ti jỏh mangai.

²⁰ Bài mangai ma oe rìh, aih bài mangai ma ùh hìaq cachit ka bài kan ranac aih, dua ùh raxach hu cadac bài ngè tì kỏng wì haq ma broq loh, dua toq kùh waiq kiac chỏc xam radua qmù broq xi wang xam bac xam òùng, xam hmo, xam long aih bài kan cato qmù ùh qnì hnoq, ùh xau tàng, ùh qnì lam.

²¹ Wì haq ùh raxach ka jêh mangai, ka blòeh blỏng, ka tango, atùng.

10

Bình pỉnh wê hset canua

¹ Khoe aih au hnoq mòeq bình pỉnh ma qnoeq padren dêh raya, loh enh pỉnh, i yùc dudanh ka haq. Tagàu haq i rawiang hadỏng; hadrò haq tìah ka mat mahì, jênh haq qmang ka jrang ùnh.

² Tì haq wê mòeq toq hset qyoh khoe hlià òòeq, jênh pah qma haq jỏiq diac raxìq, jênh pah qngeo jỏiq tagùng,

³ Haq creo mòeq nà cadêh qmang ka bài sutùh ca-ùm; khoe ka bài haq creo i tapêh qmang hilùng.

⁴ Jò i tapêh qmang hilùng aih, au enh achìh yỏc, yàng au tàng i bài enh pỉnh doe: “Nìm padràng

đòeq bàu da tapèh qmang hilùng aih doe cleq, ùh dùh achìh cadèh”.

⁵ Khoe aih, bình plình au ma hnoq haq yòng tadiac xam tagùng, dèch tì pah qma ta tróc,

⁶ haq patô Mangai ma rìh halình mòeq đòe, aih Mangai ma broq loh plình xam rìm yiniq oe ta plình, broq loh taneh xam rìm yiniq ta taneh, broq loh diac raxiq xam rìm yiniq ta diac raxiq, đòeq hu hapah “Khoe diq ka jò”;

⁷ mahaq trùh hì bình plình ma tapèh am tàng dèh bàu rai hlui ken, aih èh kan hlèp da Boc Plình jah gèh geo, wop qmang ka haq ma khoe doe deh ka bài hapông haq aih la bài mangai pajàu.

⁸ Khoe aih bàu au ma khoe tàng enh plình doe hòm ka au: “Lam beq, yỏc hset qyoh ma tapèh ajang tì bình plình ma qnang yòng ta diac raxiq xam ta taneh”.

⁹ Au hì lam trùh ajang bình plình, au bòch haq am ka au hset qyoh. Haq doe ka au: “Yỏc beq khoe èh hì lỏnh hset kỏ beq; ta cliac ìh haq xang, mahaq ta hacùng ìh nhim qmang ka diac xùt”.

¹⁰ Au yỏc hset enh tì bình plình khoe au hì lỏnh; ta hacùng au haq nhim qmang ka diac xùt, mahaq jỏ au khoe lỏnh haq loh ka xang ta cliac.

¹¹ I bàu doe ka au: “Ìh oe raq ep capoch bàu pajàu ka bằc xinoe, bằc diac, bằc toq bừa hòm”.

11

¹ I mòeq ngai am ka au mòeq catoch triang niaq tìah ka long wêh maneh, rai thê au: “Yòng beq, wêh hnìm kùh waiq da Boc Plình, prang tadreo, rên xam bài mangai kùh waiq ta aih”.

² Mahaq hamlang enh gùng ka hnim kùh waiq aih cađac, apaq wêh broq cleq majah qmang aih nòe aih khoe hataq ka mangai diac qnoeq, dôq wì jôiq padit plài hadròeh aih wop jah pôn jàt baiq khê.

³ Khoe èh au hi am cwìang itai deh ka wa baiq ngai ma lam anoe panhìn da au, wa aih caxùnh eo bai briang lam capoch bàu pajàu ta 1.260 hì.

⁴ Wa haq, aih raq baiq toq long ôliu, aih raq baiq toq jènh đen ma yòng enh ngèa ka Chuaq da crống taneh.

⁵ Tàng cabô enh tabroq ka wa aih, aih èh i ùnh loh enh hacùng wa bùi đac mangai ma tagit ka wa: Mangai leq tabroq ka wa, ep cachit qmang aih.

⁶ Wa aih i cwìang clênh qmang plình, òeđeq tróc ùh mè ta bài hì wa capoch bàu pajàu; wa aih i cwìang the diac wih wia mahim rai broq bacc kan ranac ta crống taneh, enh broq jò leq dua jah.

⁷ Jò wa aih khoe gêh ka lam anoe panhìn, aih i ngè rih tọc enh hwinh jrùq, tajêh ka wa haq; ngè rih aih blêq wa haq, khoe èh jêh đac wa.

⁸ Hanang wa haq wì taqngùi đac ti trong lam da plài kàn, capoch apriah aih raq Sôđôm xam Êđiptô, nòe Chuaq da wa haq ma khoe tiang đình talong pagat.

⁹ Mangai oe rìm nòe ta crống taneh, rìm xinoe, rìm bàu capoch, rìm diac diq jah hnoq hanang wa aih ta piq hì qne, wì ùh lòh catùh hanang aih ta ralùng.

¹⁰ Bài mangai ta crống taneh lem bùi rahèh rahah acaq ôq, qnèp aràng ka dabau dahwèq jò hnoq wa khoe cachit, majah qmang aih baiq ngai

pajàu Boc Plình kô khoe broq ka mangai ma rìh ta crống taneh bàc kan ranàc.

¹¹ Mahaq atiq ka piq hì qne aih, i hi hèm rìh enh Boc Plình mùt ta wa baiq ngai aih: Wa aih padinh yòng qmòe ka jang, bài mangai ma hnoq wa diq jaq cadròt crè.

¹² Wa tàng i bàu enh plình creo ka wa: “Tốc tacô!” Wa tốc ta trốc enh dalam ka cato yùc kàn, rìm ngai ma tablêq ka wa diq hnoq.

¹³ Wop jò aih taneh loh kan ralàng kàn, mòeq phàn mòeq jàt da plài kàn ralòeh dǒng, tapèh muàn mangai cachit ta kan ralàng aih, bài mangai ma oe rìh hnoq qmang aih loh ka cadròt, rai dèch bàu manè apôi Boc Plình ma oe ta plình.

¹⁴ “Ranàc” ma baiq bu khoe; kô “Ranàc” piq rênh trùh!

Bình plình ma tapèh hlui ken

¹⁵ Bình plình ma tapèh hlui ken, ta trốc i bài bàu dèh, anoe rameh:

“Pang kô bài diac da crống taneh kô hi wìa diac Boc Plình

bèn xam Christ da haq, Haq broq bàu mòeq òe”.

¹⁶ Baiq jàt pôn gucraq qnang haqngui dèh tagèq dudan ka Boc Plình, diq kùp ta haqneq, kùh waiq Boc Plình,

¹⁷ Wì doe rameh:

“Nhèn dèch bàu manè apôi Ìh, Boc Plình ma i cwìang itai rìm trong,

aih Mangai manòeq qnang i, enh nèh khoe i,

majah qmang aih tì kǒng Ìh khoe wê cwìang diq jaq haqnèq,

Ìh khoe broq bàu.

18 Bài diac tacrồng taneh plôh nòeh, mahaq kan
 nòeh da Ìh khoe trùh,
 Manòeq khoe trùh jò, aih jò ðòeq hadrah mangai
 cachìt,
 hu baha ka hapông da Ìh aih bài pajàu,
 hu baha ka mangai da Ìh xam bài mangai loq iu
 yùq yiniq Ìh,
 baha ka mangai kàn xam mangai qyoh,
 ðòeq raliang đac mangai ma khoe broq raliang
 crồng taneh”.

19 Jò aih hnim kùh waiq Boc Plinh ta plinh hi
 tapèch, wì hnoq Hom Tajao ta hnim kùh waiq
 Haq, khoe aih i bài kan camlet, i atêh tagruàng,
 bàu cạdah, i taneh ralàng xam mè clih cato preo
 kàn.

12

Mangai gucadrì oe jiang xam bìh kàn

1 Khoe ka aih, ta trỏc i mòeq kan halac kàn:
 Mòeq ngai gucadrì i mahì oe dudan ka haq, enh
 jènh haq i mat khê, tagàu haq i cadoh bùa broq xi
 mòeq jàt baiq toq halông.

2 Haq aih oe jiang, crò hmoe xalep ka jìq
 hauang.

3 Ta trỏc hadai loh mòeq kan halac qnoeq hòh:
 Aih moeq toq bìh kàn gòh tabrùng, haq i tapèh
 toq gàu, mòeq jàt toq haki, tagàu haq i tapèh toq
 cadoh bùa.

4 Tênh haq hua mòeq phàn piq halông ta trỏc,
 lam caqnih ta crồng taneh; bìh aih rap enh ngèa
 ka mangai gucadrì qnang jìq hauang, waq toq kon
 nga clih enh cliac, haq hi lỏnh.

⁵ Mangai gucadri aih hauang mòeq ngai kon calô, kon calô aih yôc long dui mem òòeq wèq cwiang enh qnhèq ka rìm diac; kon calô aih jah òò atôc ta Boc Plinh, ta gèq cla haq.

⁶ Mangai gucadri ti amot tanòe hawit, ta aih haq khoe i nòe Boc Plinh palauq qmòeq, òòeq haq ban raðeh ta 1.260 hì.

⁷ Jò aih i kan tajêh ta plinh: Michen xam bài bình plinh da haq tajêh ka bìh kàn, bìh kàn hadai xam bài bình da haq hadai tajêh chau;

⁸ mahaq wì haq ùh blêq, aih majah pi hnoq nòe da wì haq ta plinh hòm.

⁹ Bìh kàn aih la bìh calah nèh, yiniq haq aih kan kiac, aih Satan, ma ti lam padô òòq òòq ka phù crông, khoe jah caqnìh ðac haq ta crông taneh xam bua da haq hadai.

¹⁰ Au tàng hòm ta trôc i bàu capoch dèh: “Manòeq kan dèch claih, kan dèh, xam diac da Boc Plinh bèn, khoe trùh pajùm xam cwiang itai Christ da Haq; majah qmang aih mangai ma dahì xam damang toq ti enh tah hadrah ka haq enh ngèa ka Boc Plinh, manòeq kô khoe jah caqnìh ðac.

¹¹ Wì khoe jah blêq haq xi mahim Kòn trùu xam bàu panhìn da cla, wì ùh adênh dèh kan rìh trùh qmòe jò cachit.

¹² Qmang aih òòq ka plinh xam pì ma oe ta aih, drah lem bùi beq! Habo dèh ka taneh xam diac raxìq! Majah qmang aih kiac dù loq jò da haq oe pì pang leq hòm, dài haq majah trùh ta pì rai nòeh pì cajaq.”

¹³ Jò bìh hnoq raðeh khoe bìq khwênh caqnìh ta crông taneh, haq drah qnat tiaq mangai gucadri ma khoe hauang kon calô.

¹⁴ Yàng khoe jah am ka gucadrì aih panan cliang kàn, ðòeq hu pan mùt tanòe hawit aih nòe Boc Plình palauq ðòeq ka haq amot; ta aih haq jah ban mòeq jò, bàc jò, qne jò, claih hangai ka bìh.

¹⁵ Jò aih bìh pròh diac enh hacùng haq tìah qmòe ka diac kàn hnan tiaq mangai gu cadrì, ðòeq hu qmoch ðac haq ta diac.

¹⁶ Mahaq taneh ðìh yòc gucadrì; majah qmang aih taneh hah hacùng lòngh diac bìh ma khoe capròh loh enh hacùng.

¹⁷ Bìh nòeh ka mangai gucadrì, haq lam tablêq ataq wì kon maqnoeq da gucadrì, aih bài mangai ma wèq tiaq ranenh Boc Plình rai rùp cajap bàu panhìn da Jesus Christ.

¹⁸ Bìh yòng ta braih diac raxìq.

13

Baiq toq ngè rìh ma xòc tóe enh diac raxìq

¹ Khoe aih, au hnoq enh diac tóe mòeq ngè rìh i mòeq jàt toq haki xam tapèh toq gàu, ta bài haki aih i mòeq jàt toq cadoh bùa, rìm toq gàu ðìq i achìh yiniq xam bàu capoch ùh hòq ka Boc Plình.

² Ngè rìh au ma hnoq aih tìah taiq ka beo; jo haq tìah ka jo higàu, hacùng haq tìah ka hacùng sutùh. Bìh ròng yòc deh kan ðèh, xam gèq am ka ngè rìh aih.

³ Ta bài gàu aih i moeq toq gàu habau tìah taiq ka khoe cachìt; yàng èh habau aih jah brêh, ðìq ka cròng taneh loh ka hamàih lam tiaq ðong haq.

⁴ Kon mangai kùh waiq bìh ròng majah qmang aih haq khoe yòc kan itai am ka ngè rìh aih; wì

hadai kùh waiq hloe ngè rìh aih, wì doe: “Cabô diang ngè rìh kô, cabô hlàt tablêq ka haq?”

⁵ Khoe jah am ka ngè rìh aih hacùng xam bàu loq catèh, bàu capoch qmèq Boc Plình; haq i cwìang tabroq qmang aih ta pôn jàt baiq khê.

⁶ Ngè rìh aih hah hacùng capoch ùh hòq ka Boc Plình, capoch qmèq ka yiniq haq, ka hnìm Ranòh kùh waiq haq, capoch troq hloe wì ma oe ta plình.

⁷ Khoe caqnaih ka haq i cwìang hu tajêh ka bài mangai hadròeh, haq jah blêq wì. Haq i cwìang broq gàu rìm nang noe, rìm ngai, rìm bàu capoch, rìm diac.

⁸ Dìq ka mangai oe ta crông tanèh ma kùh waiq haq, aih bài mangai ma ùh jah achìh yiniq ta hset kan rìh da Kon Trìu ma khoe cachìt qmòe enh jò baxèm broq plình crông tanèh.

⁹ Cabô i don, tamàng beq!

¹⁰ Tàng cabô rùp mangai broq dìc, aih èh cla haq ep broq dìc; tàng cabô jêh mangai xi chang, aih èh cla haq ep cachìt xi chang. Kô raq kan chiùq àt xam manoh lùì da mangai hadròeh.

Ngè rìh ma atiq tồc enh tanèh

¹¹ Khoe aih au hnoq enh tanèh tồc mòeq toq ngè rìh maqnoeq hòm, i baiq toq haki qmang ka haki kon trìu, mahaq capoch bàu qmang ka kon rông.

¹² Haq hanoh yỏc cwìang da ngè rìh ma adroe, enh ngèa ka ngè rìh aih, haq thê tanèh xam mangai oe ta aih ep kùh waiq ngè rìh ma adroe, aih ngè rìh ma i habau ten cachìt mahaq khoe jah brêh.

¹³ Haq broq bài kan halac kàn, loh qmòe ka thê ùnh enh tróc clių ta taneh enh ngèa dìq ka mangai hnoq.

¹⁴ Haq ti qnùt bài mangai oe ta crống taneh xi kan halac đeh jah broq enh ngèa ka ngè rìh ma adroe; haq thê wì broq radua qmù ka ngè rìh ka adroe, aih la ngè rìh chang ma khoe broq ka haq loh ka habau hwaq cachit, yàng èh jah rìh hlài.

¹⁵ Ngè rìh ma atiq kô i cwìang hlui qmùt hi hèm ka radua qmù ngè rìh ma adroe òòeq ka radua qmù aih jah capoch, hu broq ka rìm ngai ma ùh kùh waiq radua qmù ngè rìh aih ep cachit.

¹⁶ Haq hadai broq dìq dǝng ka mangai, yac ka mangai qyoh, mangai kàn, mangai padrǝng mangai pa, mangai broq dǝc, mangai broq cla, dìq ep i teo hadro ta kǝng pah qma, tàng ùh meh ta ngǝng,

¹⁷ ùh i cabô jah rot, jah atech cleq tàng joq ùh i ka teo hadro aih, teo hadro aih raq yiniq xam sǝq da ngè rìh aih.

¹⁸ Kan rabiaq oe ajang kô: Mangai leq ma loq, drah tǝnh sǝq da ngè rìh aih beq, majah qmang aih, sǝq aih la sǝq da mòeq ngai raq; sǝq da haq aih la 666.

14

Kon trìu xam bài mangai jah dèch

¹ Au ngan hnoq, Kon Trìu yǝng ta wang Siǝn, i 144000 mangai yǝng ti haq, dìq i yiniq Kon Trìu xam yiniq Baq achìh ta ngǝng wì haq.

² Au tàng i bàu loh enh plình, tiah qmang ka bàu diac kàn, qmang ka hilùng dên; bàu au ma khoe tàng tiah ka bàu broc wì ma rawêh;

³ wì calêu ðoe calêu maneo enh ngèa ka Gèq bùa, enh ngèa ka pôn toq ngè rih xam bài wì gucraq. Ûh i cabô loq ka ðoe calêu aih enh gùng ka 144000 mangai ma khoe jah baxon yôc hlài enh crông taneh.

⁴ Bài wì aih qnhòq lah kùi oe ti gucadri, majah qmang wì haq diq oe raq sriu. Kon Triu lam pang leq wì kô tiaq pang aih. Bài wì aih khoe jah baxon yôc hlài enh qne kon mangai ðoeq broq plì ramua hu dèch am ka Boc Plình xam Kon Triu;

⁵ ùh i mòeq nà amòng ta bàu wì haq, ùh i nòe hu cwò.

Piq bình plình anoe qnoh kan hadrah da Boc Plình

⁶ Khoe aih, au hnoq bình plình maqnoeq pan qne tróc, i Bàu lem mòeq ðoeq hu bahia am ka mangai rih ta crông taneh, ka rìm diac, rìm gùng, rìm nang noe, rìm bàu capoch.

⁷ Haq capoch cadêh: “Khòh iu yùq ka Boc Plình, rai broq qngah yiniq haq, majah qmang aih kan hadrah da haq khoe trùh; drah kùh waiq Mangai ma broq loh plình taneh, diac raxiq xam bài goe diac.”

⁸ I mòeq bình plình hatia, tiaq atiq rai doe: “Babilôn kàn tau, khoe ralàih, khoe ralàih, majah qmang aih haq i am ka rìm diac ôq alac tango mahau da haq”.

⁹ I moeq bình plình qnoeq hòh, aih bình plình ma piq, tiaq atiq, capoch dên rameh: “Tàng cabô kùh

waiq ngè rih xam radua qmù haq, i teo hadro da haq ajang ngòng, ajang kòng,

¹⁰ mangai aih èh hadai jah ôq alac kan nòeh ùh clai da Boc Plình ma hnình ta chrông mahau da haq; jah baxa ta ùnh liu hwìn oe enh ngèa bài bình plình hadròeh xam enh ngèa Kon Trìu.

¹¹ Nhòe da kan baxa wì haq pan tọc mòeq đòe. Bài mangai ma kùh waiq ngè rih xam radua qmù haq, hloe xam bài mangai ma i teo hadro i yiniq da ngè rih, aih èh xam dahì xam damang ùh i jò leq jah padài.

¹² Kô kan cajap manoh da bài mangai hadròeh: Wì haq wèq ranenh da Boc Plình rai dìq manoh lùì Chuaq Jesus Christ.”

¹³ Khoe ka aih au tàng bàu enh plình doe: “Achìh beq! Pang kô xôq ramot am ka bài mangai cachìt aih la mangai ma cachìt enh dalam ka Chuaq!” Yiang Hadròeh doe: “Jòq qnàng, majah qmang aih wì haq jah padài ka kan xalep, yiniq abroq da wì haq hanoh jah òe tiaq cla wì”.

Jò gat...jò gich plì nho

¹⁴ Au ngan hnoq, i mòeq cato yùc taboc; haqn-gui enh qnhèq ka yùc aih i mòeq ngai tìah ka kon da mangai, tagàu i cadoh bùa broq xi wang ajang tì haq wê moeq pla haiq hìn.

¹⁵ Mòeq bình plình qnoeq loh enh hnìm kùh waiq, yòc bàu dèh crêu ka haq ma haqngui ta yùc: “Drah caqnìh haiq hìn ìh qmat òòeq hu gat; majah qmang aih khoe trùh jò gat, òùng ruàng ta taneh òùm khoe dìq”.

¹⁶ Mangai ma haqngui ta yùc caqnìh dèh pla haiq ta taneh, èh ta taneh jah gat òòng.

¹⁷ Mòeq bình plình qnoeq loh enh hnim kùh waiq hadai wê haiq hin.

¹⁸ Êh mòeq bình plình qnoeq hòm i cwiàng wèq ùnh, loh enh nòe prang kùh waiq, dêh bàu crêu ka bình plình wê haiq hin: “Caqnìh haiq hin da ìh qmat beq, hu gat bài raqnhi plì nho ta taneh majah qmang aih nho khoe dùm.”

¹⁹ Bình plình caqnìh pla haiq hin ta taneh, gat dõng plì nho ta taneh hwênh tah ta apau panòeh kàn da Boc Plình.

²⁰ Apau aih ep len enh gùng ka plài kàn, i mahim ta-ùc loh enh apau aih, mahim aih hlèp qmòe ka qnhàng axêh, hìu clàng hangai jah mòeq muàn tadrâu hrinh Êt-tađo.

15

¹ Au hnoq ta trốc i mòeq kan halac maqnoeq, joq kàn joq ramòt qnàng: tapèh bình plình wê tapèh kan ranàc pulùch, majah qmang aih bài kan ranàc kô èh men jah broq ka Boc Plình brêh ka kan nòeh.

² Au hnoq i cleq meh tiàh ka diac raxìq hliang raplênh troeq guàng qngah pajùm ka ùnh, bài mangai ma khoe blêq ka ngè rìh xam radua qmù haq, hloe xam sôq yiniq da haq, yòng ti haqmai diac raxìq hliang qmang ka guàng aih. Wì haq wê broc da Boc Plình.

³ Wì calêu bàu calêu da Môise aih hapõng da Boc Plình xam bàu calêu da Kon Triu:

“Chuaq da nhèn aih Boc Plình òiq jaq i cwiàng itai, yiniq broq da ìh joq kàn joq halac qnàng, waiq Bùa da rìm taneh diac! Trong da ìh aih òiq taq atoq, òiq joq qnàng,

⁴ Waiq Chuaq nhèn, cabô ma ùh iu yùq, ma ùh dèch bàu manè yiniq ìh? Majah qmang aih mòeq ngai ìh raq ma hadròeh, rìm diac, òiq trùh hacùn cràng kùh waiq enh ngèa ìh, majah qmang aih bìac broq taq atoq da ìh, khoe jah paqnoh.

Tapèh chrǝng panòeh da Boc Plình

⁵ Khoe aih au ngan, hnoq ta trǝc i nòe hadròeh da hnim ranòh tajao tapèch.

⁶ Tapèh bình plình wê tapèh toq doe chrǝng kan ranàc loh enh hnim kùh waiq, caxùnh eo bai briang hadròeh qngah qngai, kàt caxi caqnam broq xi wang.

⁷ Mòeq ta pôn toq ngè rìh qnèp ka tapèh bình plình tapèh toq doe chrǝng broq xi wang, ta aih tah bình kan nòeh da Boc Plình aih Mangai rìh halình mòeq òe.

⁸ Hnim kùh waiq bình dǝng nhòe loh enh kan ranhòm Boc Plình xam cwìang itai haq; ùh i mangai leq jah mùt ta hnim kùh waiq aih trùh jò leq tapèh kan ranàc kàn da tapèh bình plình jah broq gèh.

16

Tapèh ranàc atìq lùch ùc qnoh ta crǝng taneh

¹ Khoe aih, au tàng bàu dèh loh enh hnim kùh waiq doe ka tapèh bình plình: “Drah lam, ùc qnoh tapèh doe chrǝng kan panòeh da Boc Plình loh ta crǝng taneh beq”.

² Bình plình ma adroe ùc deh doe chrǝng loh ta crǝng taneh, bài mangai ma kùh waiq radua qmù rai i teo hadro da ngè rìh, loh dǝng ka pa-êh ra-om jìq.

³ Bìn̄h pl̄nh ma baiq, ùc doe chr̄ng da haq ta diac raxìq, diac raxìq wìh wìa mahim, tìah ka mahim mangai cachit; rìm yiniq ma rìh ta diac raxìq cachit òiq dǒng.

⁴ Bìn̄h pl̄nh ma piq, ùc doe chr̄ng da haq loh ta diac xam goe diac, diac wìa dǒng mahim.

⁵ Au tàng bìn̄h pl̄nh ma wèq diac doe:

“Chuaq joq taq atoq, Ìh aih Mangai qnang i, khoe ì enh nēh,

Ìh Mangai hadròeh khoe hadrah cr̄ng tanēh kô;

⁶ majah qmang aih wì haq khoe broq dahrôq mahim mangai hadròeh xam bài mangai pajàu, Ìh khoe am wì haq ôq mahim: aih joq ra-òh qnàng”.

⁷ Au tàng enh prang kùh waiq i bàu doe: “Joa waiq Chuaq aih Boc Pl̄nh i cwìang itai rìm trong, bài kan hadrah da Ìh òiq taq atoq, òiq joq qnàng”.

⁸ Bìn̄h pl̄nh ma pôn ùc deh doe chr̄ng ta mat mahì, mat mahì jah cwìang bùh ca-et kon mangai.

⁹ Kan tôq broq ka kon mangai loh ka ca-et dǒng, wì haq capoch qmèq hloe ka yiniq Boc Pl̄nh aih Mangai ma i cwìang enh qnhèq dǒng ka bài kan ranàc aih, wì haq hadai ùh raxach òèq hu dèch kan ranhòm ka Boc Pl̄nh.

¹⁰ Bìn̄h pl̄nh ma padam ùc deh doe chr̄ng ta gèq da ngè rìh, diac da haq aih hì loh ka clam cluiq, ta kan jìq kon mangai loh ka ti kap deh rapet.

¹¹ Ta kan jìq, kan pa-êh, wì haq ti capoch qmèq ka Boc Pl̄nh oe ta pl̄nh, wì haq dua ùh raxach dèh trong qmèq òeh ma khoe broq.

12 Bỉnh plình ma tadrâu ùc deh doe chrõng ta cròng diac Ôphorat; diac aih loh ka xot croh, ðòeq padon trong lam am ka bài bùa enh apah mat mahì tồc.

13 Khoe aih au hnoq enh hacùng bỉnh ròng, enh hacùng ngè rìh, enh hacùng pajàu qnùt loh piq toq kiac dù, tiah taiq ka bài kít.

14 Aih raq kiac da Satan, broq bài kan halac, lam trùh ta bài bùa ta cròng taneh ðòeq tagop ti dabau hu padon ðòeq kan tajêh ta hì kàn da Boc Plình ma ðìq jaq itai.

15 “Ngan oq! Au trùh tiah ka mangai atùng. Xôq ramot am ka mangai hmàng hamang rai wèq dèh eo, ðòeq ùh lam chac dech ðôq wì qnoeq ùh hìaq hnoq deh kan camaih”.

16 Wì tagop da bau oe mòeq nòe, tiaq bàu Hêbru ajang aih wì crêu Hamagêdon.

17 Bỉnh plình ma tapèh ùc deh doe chrõng ta cayêu, aih i bàu capoch dèh enh hnim kùh waiq, loh enh nòe gèq bùa doe: “Khoe gêh”.

18 Draq adrinh hloe jò aih i kan camlet cađah, atêh hi gruàng, bàu hilùng xam kan ralàng dèh ta cròng taneh, taneh ralàng dèh ðìq jaq enh jò baxèm i kon mangai trùh manòeq qnhòq lah i qmang aih.

19 Plài Kàn tapah loh piq, plài da diac wì ralaih cùh ðổng, Boc Plình hmàng trùh Babilôn kàn ðòeq hu pangoc ka haq chrõng panòeh.

20 Bài pleo diac amot ðổng, bài bui wang pi oe hnoq hòm.

21 Bài cato preo kàn, trap mòeq talàng, enh tróc cùh túc kon mangai, taiq kan ranàc tróc cùh preo

aih, kon mangai hi capoch qmèq ka Boc Plình,
majah qmang aih kan ranàc aih ramòt joq qnàng.

17

Kan hadrah ka Babilôn kàn

¹ Jò ta tapèh bình plình ma wê doe chrông, aih
i mòeq bình plình thia haten doe ka au: “Lam
ajang kô, au hu patô am ka ìh hnoq kan hadrah ka
mangai gucadrì tango kàn, haq ma haqngui enh
qnhèq ka bài crông diac kàn tau.

² Bài bùa oe ta crông tanèh tango ka haq,
mangai ma oe ta crông tanèh hadai bùbia ka alac
tango haq.”

³ Khoe aih, bình plình hi aràng au lam enh
dalam ka Yiang Hadròeh haq qnung trùh tanoè
hawit; au hnoqmangai gucadrì haqngui enh
crông mòeq toq ngè rìh gòh tabrùng, ta chac haq
achìh toq yiniq bài bùa capoch ùh hòq ka Boc
Plình, i tapèh toq gàu xam mòeq jàt toq haki.

⁴ Mangai gucadrì aih caxùnh eo gòh ngùi. Anì
toq bài wang, hmo canaq, ngốc, ajang tì haq wê
moeq toq doe chrông wang bình toq kan trùq, kan
tango amù.

⁵ Ajang ngòng achìh mòeq toq yiniq rameh:
Kan hlèp da Babilôn kàn,
aih miq bài mangai tango
xam bài kan amù trùq ta crông tanèh.

⁶ Au hnoq mangai gucadrì aih bùbia ka mahim
bài mangai hadròeh xam mahim mangai cachit
ka Chuaq Jesus Christ; au hnoq loh ka hamàih.

⁷ Bình plình bòch au: “Gleq ìh majah hamàih? Kô
au hu anoe ka ìh loq kan hlèp da mangai gucadrì

xam ngè rìh ma chò haq, aih ngè rìh ma i tapèh toq gàu xam mòeq jàt toq haki.

⁸ Ngè rìh ìh ma khoe hnoq, adroe aih khoe i, yàng manòeq kô khoe pi i; kô èh haq jah tồc enh hwinh jrùq khoe aih lam trùh ta kan lùng pac; bài mangai oe ta taneh aih bài mangai ma ùh i achìh yiniq ta hset kan rìh enh jò broq plình crống taneh, hnoq ngè rìh aih wì hamàih, majah qmang aih, nèh haq khoe i, manòeq kô pi i, yàng èh atìq aih ka doe haq jah trùh hòh.

⁹ Ajang kô ep i manoh rabiaq ka hèm: Tapèh toq gàu aih tapèh toq bui wang gucadrì aih ma haqngui enh qnhèq.

¹⁰ Aih hadai tapèh toq bùa; padam ngai adroe khoe taclìh, mòeq ngai aih qnang i manòeq, mòeq ngai hòh qnhòq trùh; jò haq aih hi jah trùh, haq hadai ùh oe dùnh pang leq.

¹¹ Ngè rìh ma khoe i adroe yàng manòeq pi i, aih raq bùa ma rahem; haq aih hadai mòeq bùa ka tapèh bùa tau, haq hadai lam trùh ta kan lùng pac.

¹² Mòeq jàt toq haki aih mòeq jàt toq bùa qnhòq jah waq deh diac; mahaq wì haq wiang broq bùa pajùm ti ngè rìh dù tau ta mòeq jò raq.

¹³ Wì haq pajùm moeq manoh ðòeq jao dống deh cwiang am ka ngè rìh dù xòc.

¹⁴ Wì tajêh ka Kon Trìu, Kon Trìu blêq wì haq, majah qmang aih haq aih Chuaq da bài chuaq, Bùa da bài bùa; bài mangai ma khoe jah crêu, mangai khoe jah ràih xam bài mangai ma ùh tablòq manoh ðìq jah oe pajùm ti Kon Trìu, hadai jah wiang blêq.

¹⁵ Khoe aih, bình plình doe hòh ka au: “Bài

cròng diac ìh ma khoe hnoq i mangai gucadrì tango haqngui enh qnhèq, aih bài nang noe, bài mangai bác, bài diac xam bài bầu capoch.

¹⁶ Cla ngè rìh xam mòeq jàt toq haki ìh ma khoe hnoq atìq èh wì hi git ka gucadrì tango, wì haq wìh hlài raliang đac rai broq ka haq loh ka talùch, nhah jam haq rai bủ haq ta ùnh.

¹⁷ Majah qmang aih Boc Plình khoe dỏq wì aih broq tiaq manoh Haq ma enh, jỏ Haq broq ka wì aih mòeq manoh ti dabau đòeq jao đỏng deh cwiang am ka ngè rìh tau, trủh jỏ bầu da Boc Plình jah xít.

¹⁸ Mangai gucadrì ìh ma khoe hnoq, aih raq plài kàn wẻq cwiang enh qnhèq ka bài bủ ta crỏng taneh.

18

Raliang đac Babilỏn kàn

¹ Atìq ka bài yiniq aih, au hnoq mòeq bình plình loh enh plình, haq i cwiang kàn, kàn ranhỏm haq srẻu qngah qngiang ta crỏng taneh.

² Haq creo ka dẻh “Babilỏn kàn khoe ralàih, khoe ralàih! Plài kàn aih khoe wìa nẻ oe da kàn kiac, nẻ trom nẻ kỏp da jrỏng, kỏp da bài adrech chẻm qmẻq qmac kỏn mangai ma cadrỏt ka hnoq,

³ majah qmang aih rẻm diac khoe bủ ka alac tango anang da haq, bài bủ ta crỏng taneh khoe tango ti haq, bài mangai padro ta crỏng taneh khoe jah padrỏng kàn enh kàn loq racaih da haq.

⁴ Au tàng i bầu qnoeq enh trỏc doe rameh:

“Dìq ka mangai da Au, drah loh ma khoe ka Babilỏn,

Tabeq rayeq èh pì loq wiang poh yiniq lui ti haq,
loq ep wiang pòq kan ranàc ti haq.

⁵ majah qmang aih yiniq lui da haq qmat
haqnèq khoe trùh ta plình,

Boc Plình khoe hmàng trùh kan dù da haq.

⁶ Pì broq hlài ka haq bài yiniq haq ma khoe broq
ka mangai qnoeq,
patem chau ka haq loe baiq yàng,
clai ka haq loe baiq chrǒng haq ma khoe clai ka
mangai qnoeq.

⁷ Haq catèh rai hnhè rađeh ta kan padrǒng cla
haq dàng leq,

aih broq ka haq jìq xa chau dàng aih.

Majah qmang aih tacliac haq doe

“Au kô bùa cadrì haqngui dèh tagèq,

ùh xài mangai hadrô, ùh jò leq au hnoq kan crò
hmoe”.

⁸ Aih iq dài majah ta mòeq hì raq,

bài kan ranàc kô majah caqnìh enh qnhèq ka haq,

kan cachìt, kan crò hmoe, kan pangot hrah,

xam ùnh bùh chac haq;

majah qmang aih Boc Plình ma hadrah haq, aih

Boc Plình I padren dèh haraya”.

⁹ Bài bùa ta crǒng tanèh ma khoe tango khoe
wiang jah waq kan padrǒng ti haq hnoq nhòe ùnh
cheo haq aih èh wì toq crò hmoe.

¹⁰ Yùq loq ep wiang pòq kan xalep ti haq, wì toq
yòng haqmiang enh hangai rai doe:

“Hăbô qnàng, hăbô qnàng, Babilôn aih plài kàn,
plài padrǒng tau! Bu mòeq jò raq, kan hadrah gè
khoe trùh”.

¹¹ Bài mangai padro ta crõng taneh hadai mangò crò hmoe ka haq, majah qmang aih pi oe i cabô rot dahwèq rađeh hòm.

¹² Dahwèq aih bài: wang, bac, hmu lem, ngốc, bai habuàt, bai gòh, bai lùaq, bai drinh; bài long xua thùm; bài dahwèq broq xi bla roeh, long canaq, ãùng, mem, hmo.

¹³ Cwèq, tiaú, ãau, janh xua thùm, gahnàu, alac, ãau oliu, bài ãac lem, hmau phi, ão, triu, axêh xam xê axêh, hapõng ãic, hloe xam mahua yiang kon mangai.

¹⁴ Wì doe

“Bài plì manoh ìh ma toq tangèh chaq hnhung khoe ãiq,
kan qngah padrõng rahù ìh khoe lùch, chaq ma oe hnoq”.

¹⁵ Bài mangai padro aih canòm ka Babilôn khoe loh ka padrõng kan, ãiq yòng enh hangai, wì yùq rađeh loq ep wiang xalep ti haq; wì crò hmoe rai mangò ka haq, wì doe:

¹⁶ “Hão hrình, hão hrình, ka plài kàn tau,
khoe hmaq atàc toq bai habuàt gòh ngùi, gòh drinh,
anì qngah qngiang toq wang, toq ngoc, toq hmu canaq!

Ta mòeq rahyàc raq, kan padrõng rahù ranhòm aih hnhung ãõng khoe ãiq!”

¹⁷ Mangai wèq boang, mangai lam trong ãiac, xam mangai oe ta boang, bài mangai padro ta ãiac raxìq, ãiq yòng enh hangai,

¹⁸ jò wì hnoq nhòe ùnh cheo haq, wì cachech: “I plài leq kàn ãang plài kô!”

19 Wì haq yǒc blo raid deh tagàu, crò hmoē adēnh ka haq, wì doe: “Hābo hrình, hābo hrình qnàng! Haq kô khoe yǒc kan padrǒng rađeh ðòeq broq ka rìm mangai i boang ta diac raxìq jah padrǒng kan ðeh diq, ta mòeq rahyàc raq khoe wìa nòe hawit.

20 “Diac Plình, Ìh drah bùi lem ka haq beq
Pì mangai hadròeh, lem bùi beq
Mangai pajàu, bài mangai tiaq cla, bùi beq
Majah qmang aih jò Boc Plình hadrah gucadrì aih.
Haq khoe broq kan taq atoq am ka pì”.

21 Khoe ka aih, mòeq bình plình dēh padren yǒc mòeq toq hmo qmang ka apau kàn khwēnh caqnìh ta diac raxìq, haq doe

“Plài kàn Babilôn tau èh,
hadai ep khwēnh caqnìh cadēh qmang kô èh diq,
aih èh pì cabô oe hnoq haq hòh.

22 Pì i cabô oe tàng bàu rawēh broc, bàu hlui ken bàu hlui taliaq enh nòe haq hòh.

Ta ìh kô yac ka padro cleq dua pì ka mangai patìh
kaq kùng,

bàu apēh qmau dua pì tàng.

23 Qngah ðen pì sreō ta ìh hòh,

wì pì oe tàng bàu ǒng mai neo taqnèp,

majah qmang aih bài mangai padro ti ìh aih diq
bài gucraq ta crǒng

taneh,

Canàih ìh khoe pawè dǒng mangai rìm diac.

24 Tacô wì chaq hnoq mahim bài mangai pajàu,
mangai hadròeh

xam diq dǒng mangai ta crǒng taneh, ìh khoe jēh
đac ka cachìt”.

19

Calêu manè jò Babilon khoe ralàih

¹ Khoe ka bài yiniq kô, au tàng i bầu dên tiah ka bầu da mangai bàc haraya:

“Alêluja! Kan dèch claih, kan ranhòm, kan dên padren dìq oe ta Boc Plinh bèn.

² Majah qmang aih kan hadrah da haq dìq taq atoq, dìq joq qnàng. Haq khoe hadrah mangai gucadri tango kàn aih, Mangai ma khoe yôc deh kan tango broq raliang dồng ta crông taneh, Haq khoe taboe hlài mahim da bài hapông haq khoe ta-ùc ajang tì kông mangai gucadri tango kàn aih”.

³ Wì calêu hòm yàng ma atiq: “Alêluja! Nhòe da haq pan tọc yôt mòeq đòe”.

⁴ Baiq jàt pôn ngai gucraq hacrùn cràng haqneq kùh waiq Boc Plinh aih Mangai ma haqngui tagèq, wì doe: “Amen, Halêluja!”

⁵ Draq adrinh hloe jò aih enh nòe gèq bùa i bầu doe:

“Dìq dồng ka pì aih mangai hapông Boc Plinh, aih bài mangai ma loq iu yùq ka Haq, yac ka mangai qyoh mangai kàn hadai, drah calêu manè apôi Haq”.

⁶ Khoe aih, au tàng hòm bầu tiah ka bầu mangai bàc haraya, ùh i crài cleq ka bầu diac kàn, bầu cađah dên, bầu aih doe rameh:

“Halêluja! Chuag aih Boc Plinh bèn, aih Mangai i cwiàng rìm trong, khoe broq bùa.

⁷ Beq bèn lem bùi, beq bèn apôi, padèch kan ranhòm ka Haq; Majah qmang aih hì taqnèp da Kon Trìu khoe trùh, mai da Haq hadai khoe palàng rađeh,

⁸ khoe jah caxùnh eo taboc chah ma raplênh broq xi bai habuàt” (bai taboc aih yiniq broq da bài mangai hadròeh).

⁹ Bình plình doe ka au:

“Achìh beq, Joq xôq ramot qnàng ka mangai majah akhen trùh acaq yiniang taqnèp ổng mai da Kon Trìu!”

Haq anoe hòm: “Aih òiq bài bầu joq qnàng da Boc Plình”.

¹⁰ Au hacùn cràng ta haqneq ka jènh haq òòeq hu kùh waiq, mahaq haq doe ka au: “Apaq broq qmang kô, au hadai mangai hapông tìah ka ìh, qmang ka bài òh òiq ìh, hanoh wèq bầu òòeq lam anoe panhìn ka Jesus. Ìh ep kùh waiq Boc Plình. Majah qmang aih lam anoe panhìn ka Jesus aih la manoh cliac da bài bầu pajàu.”

¹¹ Jò aih au hnoq plình tapèh, i moeq toq axêh taboc: Yiniq mangai kòe axêh aih: “Mangai ùh tablòq manoh xam Mangai capoch jang”. Haq yóc kan taq atoq òòeq hadrah rai òòeq tablêq.

¹² Mat Haq tìah ka ùnh, gàu haq i bàc toq cadoh bùa i achìh mòeq toq yiniq, enh gùng ka cla Haq ùh i cabô loq.

¹³ Haq caxùnh eo tâm ta mahim, yiniq da Haq aih bầu Boc Plình.

¹⁴ Bài lình plình òiq caxùnh eo habuàt taboc, hreo lem, kòe axêh mông lam tiaq Haq.

¹⁵ I mòeq pla chang hin loh enh hacùng Haq, Haq yóc chang aih hu tablêq ka bàc diac ta taneh, Haq wèq wì aih xi mòeq toq long mem. Haq jôiq len plì nho ta apau, aih apau panòeh da Boc Plình itai rìm trong.

¹⁶ Ta cataih xam ta eo Haq achìh mòeq toq yiniq: “Bùa da bài bùa, Craq da òe Craq”.

¹⁷ Au hnoq mòeq bình plình yòng ta mahì. Haq dèch bàu creó ka bài chìm pan ta tróc, rameh: “Trùh beq, pì tagop dabau trùh acaq yiniang kàn da Boc Plình,

¹⁸ Acaq jam bài bùa, jam bài cla craq, jam bài mangai tanoq, jam axêh xam mangai kòe axêh, jam da rìm ngai, mangai broq díc jam mangai broq deh ka cla, enh jam mangai qyoh trùh jam mangai kàn”.

¹⁹ Au hnoq ngè xóc xam bài bùa ta crống tanèh xam bình lình wì haq tagop tì dabau hu tajêh ka Mangai kòe axêh xam lình da Haq.

²⁰ Mahaq ngè xóc bìq rúp, bài pajàu qnút aih mangai khoe broq kan halac enh ngèa ka ngè xóc, canòm ka haq òeq tì qnút bài mangai ma khoe i teo hadro da ngè xóc rai kùh waiq haq hadai bìq rúp, dìq baiq wa haq oe raq rìh mahaq bìq hwênh caqnìh tabau ùnh xam liu hwìn cheo dra adrènh.

²¹ Wì ma qnoeq dìq cachìt ka chang maloh enh hacùng Mangai ma kòe axêh, dìq dồng bài chìm jah panàc ka jam wì aih.

20

Ta qnhòng mòeq mùan hanam

¹ Atìq ka aih, au hnoq mòeq bình plình loh enh plình, tì haq wê gahlòng da hwìn jrùq xam mòeq hadrang caxi datoq kàn.

² Khoe aih haq rúp bìh kàn, aih bìh dùnh calah nèh, aih kan kiac, aih Satan, clang kàt òeq haq ta mòeq mùan hanam.

³ Haq khwênh caqnîh bìh aih ta hwin jrùq, clòng qmang hwin jrùq aih khoe èh haq hi nìm padràng, dōq bìh aih pi oe jah lam qnùt bài diac ta crōng taneh hōm, trùh jò leq hi khoe ka mōeq mùan hanam. Khoe aih èh, Satan hadai ep jah caqnaih mahaq ùh dùnh.

⁴ Au hnoq bài gèq, bài mangai haqngui tagèq jah cwàng òeq hadrah. Khoe aih au hnoq mahua bài mangai khoe ep cachit ka wì pot rănōng taiq wì haq lam anoe panhìn ka Chuaq Jesus xam bàu da Boc Plình, mahua bài mangai ma ùh kùh waiq ngè xòc xam radua qmù haq, ùh waq yōc teo hadro da haq, yac ka tangòng ta kōng. Wì aih jah rìh hlài, jah wēq cwàng pajùm ti Christ ta mōeq mùan hanam.

⁵ Bài mangai cachit ma qnoeq ùh jah rìh hlài jò qnhòq khoe ka mōeq mùan hanam. Aih kan rìh hlài yàng ma baxèm.

⁶ Joq xōq ramot qnàng, joq hadròeh qnàng ka bài mangai majah kan rìh hlài yàng ma baxèm! Kan cachit yàng ma atiq pi oe i cwàng cleq enh qnhèq ka wì haq; mahaq wì aih jah broq pajàu da Boc Plình xam da Christ, jah hadai broq bùa ti Haq ta mōeq mùan hanam.

⁷ Jò mōeq mùan hanam hi diq, Satan hi jah caqnaih,

⁸ loh enh gùng ka nòe ma clêh, haq lam padô mangai oe jàp jìa ta crōng taneh, mangai Got xam mangai Magot; haq gop ahlài wì oe mōeq nòe òeq padon tajêh tablah, wì bàc qmang ka braih diac raxìq...

⁹ Wì haq lam jàp ta taneh, ti dudanh nòe mangai da Boc Plình oe xam plài Haq ma loq waq

deh. Mahaq i ùnh enh plình loh bùh wì haq cachit dǒng.

¹⁰ Satan aih mangai ma ti padô wì haq aih èh jah caqnìh đac haq ta bau ùnh xam liu hwìn, ta aih khoe i ngè rìh xòc xam bài pajàu qnùt. Wì haq ep chiùq kan baxa xam dahì xam damang trùh hloe mòeq đòe.

Kan hadarah ma atìq lùch

¹¹ Khoe aih au hnoq mòeq toq gèq taboc kàn xam Mangai ma haqngui ta aih, enh ngèa Haq trǒc taneh amot dǒng, pì hnoq nòe ajang leq đòeq ka wì haq hòm.

¹² Au hnoq mangai cachit xam kàn xam qyoh, dǐq yǒng enh ngèa ka nòe hadrah, bài hset dǐq tapèch. Èh i mòeq toq hset qnoeq hòm, aih hset kan rìh; mangai cachit jah hadrah tiaq deh trong wì haq ma broq, wop qmang ka bàu achìh ta hset aih.

¹³ Diac raxìq padreo mangai cachit ma oe ta haq; Kan cachit xam Hwìn hadai padreo hlài mangai cachit oe ta haq. Rìm ngai wì aih chiùq jah hadrah tiaq trong đeh ma broq.

¹⁴ Khoe ka aih, Kan cachit xam Hwìn, hadai jah caqnìh đac ta bau ùnh. Bau ùnh aih raq kan cachit yàng ma atìq.

¹⁵ Mangai leq ùh jah achìh yiniq ta hset kan rìh, ep hwênh qnìh dǐq ta bau ùnh.

21

Jerusalem maneo

¹ Khoe aih au hnoq tróc neo xam taneh neo, majah qmang aih tróc xam taneh ma adroe khoe hnhung, diac raxiq hadai pi i.

² Au hadai hnoq Plài Hadròeh, aih la Jerusalem maneo enh plình, loh enh Boc Plình, khoe padon qmòe qmang ka mai neo taqnèp anì dèh ka ổng.

³ Au tàng i bầu dèh loh enh nòe gèq doe rameh: “Hacô! Ranòh kùh waiq da Boc Plình oe qne kon mangai, Haq oe ti wì, wì jah broq mangai da Haq; cla Boc Plình jah oe ti wì.

⁴ Haq xùt hreo diac mat enh mat wì, pi oe i kan cachit, kan mangò, bầu crò hmoe, kan jìq xa hòh, majah qmang aih bài yiniq ma adroe khoe pi i.

⁵ Mangai haqngui tagèq doe: “Au broq neo hlài rìm yiniq”. Haq doe hòh: “Achìh beq, majah qmang aih bầu bầu kô dìq khòh lùì, dìq joq qnàng”.

⁶ Haq doe ka au: “Khoe gèh! Au kô Anpha xam Ômega, aih la baxèm xam pulùch. Cabô croh ranǒng, Au yǒc thòng diac kan rìh òe q am dech ka haq.

⁷ Mangai leq blêq hi jah bài yiniq aih òe q broq kùng hang, au jah broq Boc Plình da mangai aih, haq aih jah broq kon da au.

⁸ Bài mangai ma lèu, mangai ma ùh lùì, mangai jiang ka ramòt, mangai jèh đac mangai, mangai tango anang, mangai ti pàih panàih blài blǒng, mangai kùh waiq radua qmù, xam mangai capoch amòng, nòe da wì haq aih bau ùnh xam liu hwình khàng ma adrènh: Aih raq kan cachit yàng baiq.”

⁹ Mòeq ta tapèh ngai bình plình ma khoe wê tapèh toq doe chrǒng kan ranàc, thia haten doe ka

au: “Trùh ajang kô beq, òeq au patô ka ìh hnoq kon mai, aih mai maneo ban da Kon Trùu”.

¹⁰ Khoe aih ta phàn yiang, bình plình aih qnung au lam tồc ta bui wang kàn haqnhèq, patô ka au hnoq Plài Hadròeh, aih la Jerusalem, enh plình, loh enh Boc Plình,

¹¹ qngah qngiang kan ranhòm da Boc Plình. Kan ca-ah ca-iang da plài aih tìah qmang pliang hmu ngốc ma canaq bac, qmang ka ngốc hmu lang hliang ma raplên.

¹² Haq i panàt haqngghèq, i mòeq jàt baiq toq qmang, xam mòeq jàt baiq bình plình ajang trong qmang, enh qnhèq ka qmang achìh yiniq da mòeq jàt baiq nang noe Isorali.

¹³ Panàt pah mat mahì tồc i piq toq qmang, enh pah qngeo i piq toq qmang, enh pah qma i piq toq qmang, enh pah mat mahì clìh i piq toq qmang.

¹⁴ Panàt plài aih i mòeq jàt baiq toq hmu xem, ta aih achìh yiniq da mòeq jàt baiq ngai Tiaq cla da Kon Trùu.

¹⁵ Bình plình ma capoch ka au tì haq wê mòeq toq long maneh aih long triang niaq broq xi wang òeq wêh plài aih, wêh bài qmang xam panàt plài.

¹⁶ Plài aih pôn bè daq adàng, dang gat dang yôh taq atoq ka dabau. Bình plình wêh plài aih xi catoch triang niaq: Plài aih jah mòeq jàt baiq mùan êtado, dang yôh, dang gat, dang yàng dĩaq taq atoq.

¹⁷ Haq wêh panàt plài bè habàu jah: Mòeq hrinh pôn jàt pôn cuê, aih maneh wêh da bình plình, hadai maneh wêh da kon mangai.

¹⁸ Panàt broq xam ngốc hmu lang, plài aih broq xam wang, hliang raplên qmang ka guàng.

¹⁹ Jo xèm panàt plài aih broq toq xi hmu canaq. Xèm ma adroe aih xam hmu lang, xèm ma atìq aih xi hmu ngốc saphia, xèm ma piq aih xi hmu ngốc mainao, xèm ma pôn aih xam hmu ngốc nget,

²⁰ xèm ma padam aih xi hmu mainao gòh drinh, xèm ma tadràu aih xi hmu rubi; xèm ma tapèh aih xi hmu ngốc ngèq ngèq, xèm ma rahem aih xi ngốc thih thuàng, xèm ma hachin aih xi ngốc gòh nget, xèm ma mòeq jàt aih xi ngốc xênh, xèm mòeq jàt mòeq aih xi hmu ngốc gòh, xèm mòeq jàt baiq aih xi hmu lang gam.

²¹ Mòeq jàt baiq toq qmang broq xi mòeq jàt baiq pliang ngốc, rìm toq qmang òiq broq enh cato ngốc. Trong lam ta plài òiq broq xam wang, hliang qmang ka guàng.

²² Ta aih au ùh i hnoq mòeq toq hnim kùh waiq leq, majah qmang aih Boc Plinh i cwiang itai rìm trong xam Kon Trùu aih raq hnim kùh waiq da plài aih.

²³ Plài aih hanoh ùh hìaq ep waq ka i mat mahì, mat khô òeq sreo qngah; majah qmang aih i kan ranhòm da Boc Plinh sreo qngah qngiang, Kon Trùu aih raq ðen da plài aih.

²⁴ Bài diac wì lam tiaq kan qngah plài aih, bài bùa ta crông taneh aràng deh kan nhòm nhìn qmùt ta aih.

²⁵ Bài qmang ta plài aih dahì ùh clênh majah qmang aih ta aih ùh i ka damang.

²⁶ Kan rahù ranhòm da bàc diac jah aràng qmùt ta aih,

²⁷ mangai ùh hadròeh, mangai broq trong qmèq, mangai loq qnùt blinh ùh jah mùt; mahaq

đòeq toq ka bài mangai ma khoe jah achìh yiniq
ta hset kan rìh da Kon Triu.

22

Sôq ramot da mangai jah raih

¹ Bình plình patô am au ngan cròng diac kan rìh,
hliang raplênh qmang ka ngốc xênh, loh enh gèq
da Boc Plình xam da Kon Triu.

² Taqne plài xam baiq bè diac i long kan rìh loh
pli mœq jât baiq yàng ta hanam, mœq khê mœq
yàng loh pli; bài hla da haq đòeq broq brêh ka kon
magai.

³ Pi oe bàu capoch hanip hòm, gèq da Boc Plình
xam Kon Triu oe qne plài, bài hapông da Haq jah
patìh dèh ka Haq;

⁴ wì haq jah hnoq hadrò deh Chuaq, yiniq da
Chuaq jah oe ajang ngòng wì haq, pi oe i ka
damang hòm,

⁵ yac ka qngah đen, qngah mahi dua wì haq pi
oe ep waq hòm, majah qmang aih i Boc Plình sreo
qngah am ka wì; wì haq jah broq bùa mœq đòe.

Bàu pariaq ma atiq lùch

⁶ Bình plình doe ka au: “Bài bàu kô dìq bàu khòh
lùi, bàu joq qnàng, Chuaq aih raq Boc Plình da
yang bài pajàu, khoe thê deh bình plình haq loh
patô ka hapông Haq rìm yiniq ep drah rênh trùh.

⁷ “Ngan kô Au rênh trùh! Xôq ramot am ka
mangai leq wèq bài bàu pajàu oe ta hset kô”.

⁸ Au kô Jon, mangai ma khoe hnoq rai tàng bài
yiniq kô. Jò au khoe tàng rai hnoq, au bla op
rađeh ta haqneq ajang nòe jènh bình plình ma

khoe patô ka au bài yiniq kô, ðòeq kùh waiq haq aih.

⁹ Mahaq bình plình aih doe ka au “apaq broq qmang qmat! Au kô hanoh hapǝng qmang ka ìh xam oh ðaq ìh, aih bài mangai pajàu, xam bài mangai ma wèq bàu ta hset kô; Ep kùh waiq toq Boc Plình”.

¹⁰ Khoe aih haq doe hò m ka au: “Ừh dùh nì m pagràng ðòeq bài bàu pajàu ta hset kô, majah qmang aih jò khoe haqnap”.

¹¹ Mangai ma broq trong ùh troq, ðòq da haq broq kan ùh troq hò m, mangai ma amù a trùq ðòq da haq rìh tiaq ðeh kan trùq amù a hò m, mangai ma broq trong taq atoq, ðòeq haq broq trong taq atoq hò m, mangai leq hadròeh kiang haq rìh tiaq kan hadròeh hò m”.

¹² “Ngan kô Au rên h trù h rai wê kan baha lam ti au, ðòeq baha tang ngai tiaq trong wì haq khoe broq.

¹³ Au kô Anpha xam Ômega, aih kan Adroe xam kan Atìq ðǝng, kan Baxèm xam kan Pulùch

¹⁴ Xôq ramot am ka mangai leq rùh ðeh eo ðòeq jah tajì ka thia ajang long kan rìh, jah lam trong qmang ðòeq mùt ta plài kàn!

¹⁵ Bài koq, bài mangai loq ti pàih panàih, mangai tango, mangai jêh mangai, mangai tadreo radua qmù kan kiac, mangai enh xam broq kan patìah, oe ðìq enh gùng”.

¹⁶ Au kô Jesus, khoe thê ðeh bình plình trù h panhìn bài yiniq kô am ka pì enh ngèa ka bài Tagop Hadròeh. Au kô rangàu riah, xinoe da Ðawit, Au kô raq halǝng sroq qngah qngai”.

¹⁷ Yiang Hadròeh xam mai neo doe: “Trùh beq! Mangai leq ma tàng hanoh doe: Trùh beq! Cabô croh ranǝng drah trùh. Cabô enh, drah trùh ðòeq yǝc dech ka raðeh ðiac kan rìh.”

¹⁸ Au pariaq ka mangai leq ma tàng ðàu pajàu ta hset kô: Tàng cabô tah tam cleq ta hset pajàu kô, aih èh Boc Plình dèch tam ka haq kan ranàc ma khoe achìh ta hset kô.

¹⁹ Mangai leq ma caðac ðac qnah yiniq cleq ma khoe achìh ta hset pajàu kô, aih èh Boc Plình ðoeh ðac hloe phàn ða haq talong kan rìh xam ta plài hadròeh ma khoe achìh ta hset kô.

²⁰ Mangai panhìn ka ðài yiniq kô, doe rameh: “Joq qnàng, Au rênh trùh”. Amen waiq Chuaq Jesus! Ìh rênh trùh beq.

²¹ Waiq kan tabàih dech ða Jesus Christ oe ti rìm ngai! Amen.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d